



**POLELO EA LETONA LE KHABANE MOHLOMPHEHI MOSHE LEOMA
MABAKI LE LITSEKO PAKENG TSA BASEBETSI BA TSA BOPHELO LE
SEPETLE SA QUEEN 'MAMOHATO / TS'EPONG**



Sechaba sa heso, ho qala puo ea ka, ke hlalose hore Lekala la Bosebetsi le Khiri ke lona le boalosing ba Molao oa Bosebetsi, 'me le alosa ka Pokello ea Molao ea Bosebetsi ea Labour Code Order 1992 le Sehlomathiso sa Labour Code Order 2000. Molao ena e ts'ireletsa litokelo tsa bahiri le basebetsi libakeng tsa ts'ebetso. E boetse e fa lekala la heso matla a bokena-lipakeng ha mahlokore ana a mabeli a na le likhang.

Ke ka hona kamor'a hore ke amohele lengolo ho tsoa ho Kopanelo ea Mokhatlo oa Basebeletsi ba tsa Bophelo oa Lesotho (Coalition of Health Professionals) le Mokhatlo oa Basebetsi oa Lesotho Workers Association (LEWA) ka la 24 Hlakola 2021, le neng le re ke kene lipakeng tsa khang e teng Ts'epong, ka Khaolo ea 232 "Lits'ebeletso tsa Mantlha" (Essential Services), ea Pokello ea Molao ea Bosebetsi ea 1992, ke ile ka etsa joalo.

Ka "Lits'ebeletso tsa Mantlha" ho boleloa mesebetsi e fanang ka ts'ebeletso eo ho emisoa hoa eona ho ka behang ts'ireletso kapa bophelo ba sechaba sa Lesotho ka kakaretso kapa karolo ea sona tsietsing.

Ho latela khaolo ena ea molao, ke ile ka laela hore Setsi sa Thibelo le Tharollo ea Likhang tsa Bosebetsi (DDPR) se etse lipatlisiso e le ho fumana boemo ba khang e teng sepetleleng sa Ts'epong.

Ke boetse ka laela Setsi hore se ngole tlaleho 'me se fane ka tlaleho kamora matsatsi a leshome (10) ho latela lipallo tsa Molao oa Bosebetsi.

DDPR e entse lipatlisiso 'me ea mpha tlaleho ea boemo ba boipelaetso ba baoki ba sepetleleng sa Ts'epong. Kajeno ke phatlalatsa tlaleho ena ho mahlakore a amehang le Sechaba sa Basotho. Tlaleho ena e tla fumaneha liofising tsa Lekala la Bosebetsi le Khiri literekeng tsohle tsa Naha. Phatlalatso ena ea tlaleho e tlo nka matsatsi a supileng hore batho ba ithute eona.

Ke fumane tlaleho hore baoki ba 265 Ts'epong ba lelekuoe ts'ebetsong, empa sena ha se sitisi Lekala la heso ho tsoelapele ho kena lipakeng hore ho fumanoe tharollo ea moshoelella.

KHOTSO!!

PULA!!

NALA!!